

Skilyrði sem sett eru fyrir veitingu starfsleyfis til dagforeldra í Garðabæ

Skilyrði fyrir veitingu starfsleyfis til dagforeldra byggja á *reglugerð um daggæslu í heimahúsi nr. 907/2005*. Leikskólanefnd Garðabæjar veitir dagforeldrum starfsleyfi. Leyfi leikskólanefndar er fyrst veitt til eins árs reynslutíma, en eftir það til allt að fjögurra ára í senn.

Skilyrði starfsleyfa:

Aldur.

Dagforeldri skal ekki vera yngri en 20 ára þegar leyfi er veitt í fyrsta sinn. Sé dagforeldri orðið 65 ára skal leyfi aðeins veitt til eins árs í senn.

Námskeið.

Skilyrði fyrir veitingu leyfis í upphafi er að umsækjandi hafi sótt námskeið, sbr. 20. gr. Heimilt er að veita undanþágu frá því skilyrði ef umsækjandi hefur menntun á sviði uppeldismála sem leikskólanefnd metur fullnægjandi.

Læknisvottorð.

Vottorðið skal staðfesta að ekki hafi fundist merki um sjúkdóm sem hindrað geti að umsækjandi geti tekið að sér barnagæslu. Einnig skal koma fram að aðrir heimilismenn hafi verið skoðaðir og ekkert athugavert fundist við heilsufar þeirra sem hindri samvistir við börn.

Umsögn.

Umsögn síðasta vinnuveitanda eða umsögn tveggja ábyrga aðila ef atvinnurekanda er ekki til að dreifa. Umsögnin skal bera með sér að umsækjandi teljist hæfur til að taka að sér barn í daggæslu.

Sakavottorð.

Umsækjandi skal í öllum tilvikum leggja fram sakavottorð. Sama á við um aðra heimilismenn 18 ára og eldri. Komi fram á sakavottorði að umsækjandi, eða annar heimilismaður, 18 ára og eldri, hafi hlotið refsisdóm fyrir brot á ákvæðum XXII. kafla eða XXIII. kafla almennra hegningarlaga, nr. 19/1940, og brotið beinst að einstaklingi undir 18 ára aldri, verður í engum tilvikum veitt leyfi til daggæslu barna. Um önnur brot sem fram koma á sakavottorði umsækjanda eða annars á heimilinu skal leikskólanefnd meta hvort þau hafi áhrif á hæfni umsækjanda til að hafa barn í umsjá sinni.

Húsakynni.

Húsakynnin skulu uppfylla ákvæði reglugerðar um hollustuhætti, nr. 941/2002. Leiksvæði fyrir hvert barn innandyra skal að lágmarki vera 3 fm á gólfleti fyrir hvert barn. Bæði leikrými og hvíldaraðstaða skal vera í fullnægjandi íbúðarherbergjum. Baðherbergi, eldhús og svefnaðstaða heimilisfólks telst ekki til leikrýmis barna. Heimilt er að leita umsagnar heilbrigðisnefndar, hvað húsnaði varðar, ef ástæða þykir til. Sé um að ræða daggæslu með sex börn eða fleiri þarf að liggja fyrir starfsleyfi heilbrigðisnefndar sveitarfélags í samræmi við reglugerð um hollustuhætti, nr. 941/2002.

Brunavarnir.

Fyrir liggi skoðun eldvarnaeftirlits hvers sveitarfélags á brunavörnum á heimili umsækjanda. Reykskynjarar, eldvarnateppi og slökkvitæki skulu vera í íbúðinni. Við skoðun eldvarnaeftirlits skal farið yfir hversu margir reykskynjarar þurfi að vera í íbúðinni og staðsetningu þeirra.

Lóð, leiktæki og leikföng.

Lóð, leiktæki og leikföng skulu uppfylla ákvæði reglugerðar um hollustuhætti, nr. 941/2002, reglugerðar um öryggi leikvallatækja og leiksvæða og eftirlit með þeim, nr. 942/2002, og reglugerðar um öryggi leikfanga og hættulegar eftirlíkingar, nr. 408/1994, eftir því sem við á. Útivistarsvæði barnanna skal vera afgirt.

Endurnýjun leyfa

Við endurnýjun leyfa skal umsækjandi ávallt framvísa læknisvottorði og sakavottorði. Enn fremur skal heilbrigðisvottorði skilað ef tveir dagforeldrar starfa saman.

Bráðabirgðaleyfi

Leikskólanefnd er heimilt að veita bráðabirgðaleyfi til sex mánaða í senn, þó aldrei lengur en eitt ár samfellt, þar til væntanlegt dagforeldri hefur sótt námskeið. Standi námskeið ekki til boða skal heimilt að veita bráðabirgðaleyfi þar til dagforeldri hefur átt þess kost að ljúka námskeið. Leikskólanefnd er heimilt að veita tímabundið leyfi til ættingja eða au pair í heimahúsi á grundvelli þessa ákvæðis. Au pair skal hafa bæði dvalarleyfi og atvinnuleyfi á Íslandi.

Foreldrar barna geta aldrei fengið starfsleyfi til að taka að sér að vera dagforeldrar eingöngu sinna eigin barna.

Að öðru leyti er vísað í reglugerð um daggæslu í heimahúsi nr. 907/2005 varðandi starfsemi dagforeldra.

Samþykkt í bærarstjórn Garðabæjar

xxxx

*Guðjón Erling Friðriksson,
bæjarritari.*